

Pasku: Paganismo òf Kristianismo?

"Nos no mester selebrá Pasku di nasementu; e ta un fiesta pagano!" Algun hende tin e idea ei. Nan tin rason? Tin diferente argumento na nan fabor.

Ta notabel ku iglesia antiguo no a selebrá e nasementu di Hesus pa algun siglo. Por tin vários rason pa esaki. E fecha di Hesus Su nasementu ta deskonosí; e no ta duná den Beibel. Un otro motibu por ta pasobra iglesia a konsiderá e morto i resurekshon di Hesus e sentro di nan adorashon. Un di tres rason por ta pasobra ningun fiesta den Tèstament Bieu a korespondé ku e nasementu di Hesus. Otro fiestan an si a korespondé ku diferente evento den Su bida, por ehèmpel, Pasku (Bièrnè Santu), Fiesta di Promé Fruta (resurekshon), Pèntekòstes (ora Hesus a manda Su Spiritu), èts.

Ma Pasku ta un fiesta pagano? Ta paganismo pa selebrá e nasementu di Hesus

Nos ta selebrá e dia ku nos eks-reina Juliana ta kumpli un aña mas di bida. Nos ta selebrá dia di bandera, dia di obrero, karnaval, dia di mama, dia di tata, dia di San Nikolas, èts. Maske algun di e selebrashonnan ei por ta na nan lugá, ningun ta kompará den importansia ku e nasementu di Hesus! No ta paganismo pa selebrá e echo ku Dios a bira hende! "Na prinsipio tabata e Palabra, i e Palabra tabata ku Dios, i e Palabra tabata Dios. I e Palabra a bira karni i a biba meimei di nos..." (Juan 1:1,14).

Apesar ku iglesia no a selebrá e nasementu di Hesus fo'i kuminsamentu, tòg el a bira un selebrashon importante. Dies aña despues ku iglesia di Antiokia a introdusí e selebrashon di Pasku, Chrysostom, un pastor prominente, a mustra e importansia di e evento aki. El a bisa ku sin nasementu di Kristo, no tin motibu pa selebrá Su boutismo, Su morto, Su resurekshon, òf Su asenshon, i e binimentu di Su Spiritu Santu. E tin rason. Pa selebrá e echo ku Dios a nase den nos mundu yen di piká di bèrdad ta un evento pa selebrá! E ta un selebrashon puru kristian; e no ta paganismo!

Ma talbes un pèrsona ta argumentá ku Pasku ta un fiesta pagano pasobra nos ta selebré dia 25 di desèmber, fecha di un selebrashon pagano antiguo.

No tin suficiente espasio pa duna un splikashon amplio pa e probabel motibunan pa e selekshon di e dia aki. Ta bèrdad ku e romanonan a selebrá dos fiesta pagano na fin di aña, Saturnalia (17-24 di desèmber) i Brumalia (25 di desèmber). Ma nos no mester lubidá ku e hudionan tambe a selebrá (C)hanukkah na e temporada di aña aki, un fiesta konosí tambe komo "fiesta di lus." I Beibel ta relatá ku Hesus mes a selebrá e fiesta aki (Juan 10:22).

Mayoria teólogonan ta konvensé ku Hesus NO a nase riba dia 25 di desèmber. Algun ta haña ku mart òf aprel ta mas probabel. Ma echo ta ku ningun hende sa fecha di Su nasementu. Asta e aña ku Hesus a nase no ta konosí sigur. Ma e FECHA no ta asina importante ku e FAKTO ku El a nase! No ta paganismo pa selebrá e echo ku Hesus a nase--asta si e ta kai riba mésun fecha di un fiesta pagano!

Hesus--Dios mes!--a nase komo hende! Esei ta loke nos ta selebrá! "Ata, un birgen lo wòrdu embarasá, i lo e haña un yu, i lo e yama Su nòmber Emanuel, ku tradusí ke bisa 'Dios ku nos'" (Mateo 1:21). Nò! Pasku no ta paganismo!

Ma di otro banda, nos tin ku atmití ku Pasku ta un tempu di paganismo pa hopi hende na nos islanan. Pa hopi hende, Pasku ta un tempu pa paranda, fiesta, bebe burachi. Esei si ta paganismo! Pa otronan, Pasku ta un tempu pa bai misa...pa laga tur hende mira nan bistí nobo i pa wak kon otro hende ta bisti. Nos no por yama esei kristianismo! Otronan no por imaginá Pasku sin un pia di ham, kalakuna, kas di fèrf i dòrná. Esei tampoko ta kristianismo.

Pasku pa bo por ta un selebrashon pagano òf kristian. Ta dependé kon bo ta selebré. Si bo ta rekonosé ku bo ta un pekador i ta konfia e Beibi di Bètlehem ku a muri riba e krus di Kalvario pa salvábo di e kastigu ku bo ta meresé pa bo piká, aseptando E komo Rei di bo bida, e por ta un selebrashon kristian, maske por kai riba fecha di un fiesta antiguo pagano. Ma si pa bo Pasku ta un dia pa kome, bebe, bisti, i fiesta, frankamente bisá, asta si bo bishitá misa, pa bo Pasku ta solamente un selebrashon di paganismo, maske e ta un fiesta kristian.